

S`Dani Schär seit zu eus em Komedi-Team vor em Fako müend er ned ed Knüü  
ond er müend au ned ed Chele go bätte vom Elfi bis am Drüü  
nei för euhe Uftrett höt chönd er e jedem Kostüm cho  
well mer send do ar Riniker Fasnacht ned bem Concours de la Chanson

Ich has scho emmer gwösst wäg dem Maya Kaländer werd d`Wält ned ondergoh  
ich ha me nähmli e dere Sach ganz of s`Cabaret Rotsteft verloh  
well die händ e eim vo erne Sketsch emmer gseit ganz monter  
also wäge dem got doch d`Wält ned onder

De Pabscht het gseit ich werd langsam älter mini Chräft schwende als wie meh  
ond dromm han ich en wieser Verussecht chürzlech de Rücktritt geh  
damet ich mech weder frösch fromm und fröhlich füel frey vo allne Sörgeli  
ned das es mer bis z`letscht no goht wie em Christoph Mörgeli

Die Militärflüger wo de Murer wot chömmet wien er wössed os Schwede  
doch befürwortet vo de Politiker de Chauf no lang ned jede  
jo d`Gegner die beförchte schinds wenn mer die Gripe us Schwede wähle  
es chönnte wie be dene erne Möbel öpe nöime en Schrube fähle

Ich wetti do höt zom Vorus scho d`Bouherrschaft dra mahne  
das si er Geissmatt die neu Schmutzwasserleitig den au gross gnue plane  
well sosch heits de nähmli e paar Johre du das chönnti schwöre  
s`gliche wie jetzt bem Gotthardtunnel mehr bruched e zweuti Röhre

KAIB stoht of dene Plakat wo de Bözbärg duet verziehre  
doch jetzt welled schiends es paar Lüt det obe die Plache chli aktualisiere  
jo neuerdengs do stöchi den KNAIB drufobe  
und das heisi de lut Geri Hirt: Kei neu Adrässe im Bözbärg obe

Die vo Brugg Regio warte nome no of s`Ok vo de Polizey  
ond den werd d`Stross of Rufenach em August för ein Sonntag autofrey  
jetzt het Ein vom Vcs die glorriech Idee för was no Ackerland go versoue  
wemmer jetzt die Stross för emmer speert müesst`mer det gar kän Radwäg me boue

S`letscht Jahr do send doch 2 Sprengriter be eus voll ed Schlagziele gspronge  
well der einti het z`London ar Olympiade nähmli d`Goldmedaille erronge  
ond der ander de het met sim Ross das esch sagehaft  
vo Rinike doch tatsächlich de Sprong en Grossrot gschaft

Jo för wer bout`me jetzt die schöne Terrassehüser esch mer dor de Chopf gange  
woni meti Dezämber e eusem Dorf gseh s`Bougsuech em Chäschtli hange  
jetzt esch mer de Zwänzger abegheyte weisch wer chonnt ed Chränz  
das get secher em Hunn Jörg ond em Obrist Ernst sini Altersresidänz

Eusi Guggemusik d`Opus-C-Voll die fieret hür scho 30 Jahr  
met de Susi Rey ond de Fabienne Schori als Präsidänt und Tambourmajor  
ond well die Beide be dem Verein de Lade so toll duend schmeisse  
müessti euses Motto statt „Flower-Power“ doch „Fraue-Power“ heisse

So nach em letschte Bank hät s`Komedi-Team weder schampar dorscht  
jo ond was Er eus schpändiered das esch eigentlech worscht  
ob Bier Wy Schnaps oder au es Cüpli mer trenked so allerhand  
jo also mer suffed fasch alles nor keis Kaffi am Pischterand

Jedes Jahr decht ich es Dutzend Värs also genau zwölf  
doch das Jahr han ich mech verzellt ich chome nome of Elf  
jetzt lüt ich glaub Morn of Bärn ue a ond tue en Hörer ine huhe  
chönnted er ned em Ständerot no en Stemmezähler bruche

*Der Komedi*<sup>13</sup>

Wänd er me bsueche? Ich be dehei onder „[www.komedi.ch](http://www.komedi.ch)“

Stau am Gubrischt Stau en Rothrischt Stau au vor St Galle  
Stau vor em Belche Stau vor em Gotthard und z'Basel vor de Schwyzerhalle  
Stau am Morge Stau am Obe Stau scho velli Stunde  
ond nach der Eröffnig vom Campus z'Brugg dank äno Stau em Muusloch unde

Do het doch be mer en Dütsche blöfft Komedi hast du schon erfahren  
wir haben jetzt bei uns in Deutschland Pferdefleisch in den Teigwaren  
jo das esch no gar nüt hani zuenem gseit nur das du das grad weisch  
bei uns gibt's jetzt im Bündnerland schon Lasagne mit Bärenfleisch

Zugabe zu Vers 8 (unten)

ond was de Schlatter Hanspeter nach de Wahl als erschts het wösse welle  
weni jetzt den ame of Aarau ritte wo chani mis Ross anestelle